

四庫全書

集部

欽定四庫全書

集部

北齊文紀卷一

詳校官中書<sub>臣</sub>朱文翰

主事銜<sub>臣</sub>徐以坤覆勘

總校官進士<sub>臣</sub>楊懋珩

校對官典簿<sub>臣</sub>郭祚熾

謄錄監生<sub>臣</sub>連彭年

欽定四庫全書

集部八

北齊文紀

總集類

提要

臣等謹案北齊文紀三卷明梅鼎祚編北齊著作邢魏居首其餘零篇短札取備卷帙而已所采自正史以來不過文苑英華藝文類聚通鑑諸書蓋流傳本少蒐輯為難非其網羅之未備也其首列高歡高澄亦同西晉之

編濫登三祖他如侯景報高澄書史明言王  
偉文宣即位告天文史明言魏收天保元年  
大赦詔藝文類聚明言邢邵而不歸操筆之  
人竟冒署其所代核以事實亦未睹其安又  
顏氏家訓各自為書史志相沿著錄設使全  
文載入已於體例有乖乃僅錄其序致一篇  
而一篇之中又僅錄其首四五行豈非以篇  
頁無多忽而不檢致是疎漏歟考崇禎戊寅

周鑣序鼎祚所輯文紀自東晉以下皆鼎祚  
沒後所刻蓋中多草創之稿其後人未盡是  
正因而刊之亦非盡鼎祚之失也乾隆四十  
四年六月恭校上

總纂官

臣紀昀

臣陸錫熊

臣孫士毅

總校官

臣陸

費 墀



北齊文紀序

周子故居讀史三茅友人梅朗三氏寓書曰先王父禹  
金先生文紀子嘗有意焉比徵天幸甫余賡之先生尹  
子邑而辱嘉惠也自晉之東洎庠南北胥壽棗梨誠盛  
典矣北齊後周適先告竣子曷序諸周子曰夫文自當  
塗而後南北攸分厥體屢遷風尚遞變大率江左宮商  
發越貴庠清綺河朔詞義貞剛重庠氣質質剛理勝  
其辭清綺則文過其意理深者便于時用文麗者宜于

諷詠此其得失之槩也元氏失馭高齊宇文東西稱霸  
干戈日尋觚翰不給要其文苑可得而言蓋伯仲之間  
爾夫齊之才儁貽自魏朝周之名夙半皆梁寶邢魏譽  
重艷艷互師昉約王庚藻絕關中遂變周制雖地屬中  
土而文競南音斯削江左之風漸被河朔質不勝文樸  
散為器何所當大雅而互相短長哉兩朝之文既後蕭  
統英華諸書而外散佚孔多先生裒次成書凡若干卷  
斯已勤矣其間明經術陳治紀以逮天文地志人事物



訓美惡具錄殘缺兼采匪直文辭之津奧而已蓋亦經  
世典詞者所當覽誦焉余因是而慨斯文顯晦之數矣  
昔子長史記歷元成而始重揚雲太玄識者謂四百年  
後其興矣張陸既出玄遂大行豈非時為之耶先生歷  
代文紀篋藏廿餘年張陸之契迺在余侯較之揚馬不  
先時而厚幸哉余侯經術飾治甫及下車首揚先哲表  
遺文禮名士弦誦日作聲蒸蒸起江以南單父浚儀以  
是知其選已往子過朗三之廬習其曾王父宛谿大夫

嘉靖中為給諫有直聲忤相嵩出守紹興私淑文成用  
理學顯然則先生淵源所繇來遠矣予游朗三父子兄  
弟間斌斌質有其文朗三績學工古有當世志嘗語予  
願假二紀更端唐宋以續先生之遺予壯其志數慙更  
之嗟庠天壤間所稱不朽唯是名節文章而已士有一  
不出此雖冠剡剡衣檐檐吾懼其立而腐諸余侯博物  
大雅君子也庶其不河漢庠余言于是乎書崇禎戊寅  
秋分日華陽周鑣序

欽定四庫全書

北齊文紀卷一

明 梅鼎祚 編

神武帝高歡

字賀六渾渤海脩人仕魏封渤海郡王為安州刺史起兵討爾朱氏立孝

武帝脩自為大丞相脩奔長安依宇文泰廼入洛陽立清河王子善見是為東魏及子洋篡位

追崇獻武帝廟曰太祖後主初改號神武皇帝廟號高祖

上魏節閔帝出師表

神武初歸爾朱榮每參軍謀為親信都督時魏明帝

欲除鄭儼等使榮舉兵入洛以神武為前鋒帝暴崩乃立孝莊帝依榮暴肆為攸所誅從子兆自晉陽入洛執殺之及節閔帝立改元普泰榮從弟世隆輔政封神武為渤海王

徵使入覲神武遂起義師于信陽抗表罪狀  
爾朱氏復立章武王子朗為帝進討北世隆  
及其黨盡誅之凶靈既除朝廷慶  
悅因廢節閏及朗而立孝武帝脩

臣某言故天柱大將軍榮援立聖明中興寶厯而屠戮  
衣冠升降自已其勲雖大厥咎亦深以過比功則功不  
補過永安之末國祀權移疑貳已彰遂加大戮君猶天  
也理絕讎怨而世隆等鳩集犬羊傾覆京邑大行幽執  
酷害賊首且自立六王擅相署置或權重上將或官兼  
宰相輔淫貪亂肆行兇惡賣官鬻獄專貸求財政令無

恒朝改幕易雖復南山之竹豈可盡言陛下龍德光天  
翻飛紫極斯乃宗廟之威靈億兆之念望而世隆等阻  
衆安忍自以為功帶甲勒兵唐突宮省篡逆之漸昭然  
有徵臣本無勲庸濫叨非據位班台鉉爵等藩王質薄  
任隆憂深責重常恐顛沛負之無力主憂臣辱先達明  
規主辱臣死微臣宿志况擁百萬之師罄四海之銳而  
坐觀成敗不恤國家之難哉方將摠馭大軍弔民伐罪  
其指麾形勢備在檄書若世隆等退出藩維奉辭廷闕

臣便按甲休兵一無所預事寧之後泥首歸愆矯命專  
征分甘鈇鉞若固執逆謀敢拒義師者當戮其妻孥罪  
延三族伏願陛下留神省察照臣丹款大勲克舉拜手  
有期心馳象闕載懷罔極

文苑英華  
光一作先

上魏孝武帝表

帝以斛斯椿等搆神武部署將  
帥將討之假稱南伐密書與神

武神武表上帝知神武覺其謀欲止諸軍神  
武還以表聞仍以信誓自明忠款屢故不答  
神武遂舉兵犯洛帝奔長安乃  
立清河王子善見是為孝靜帝

荊州綰接蠻右密邇畿服關隴恃遠將有逆圖臣今潛

勒兵馬三萬擬從河東而渡又遣恒州刺史庾狄干瀛  
州刺史郭瓊汾州刺史斛律金前武衛將軍彭樂擬兵  
四萬從來達津渡遣領軍將軍婁昭相州刺史竇泰前  
瀛州刺史堯雄并州刺史高隆之擬兵五萬以討荊州  
遣冀州刺史尉景前冀州刺史高敖曹濟州刺史蔡儁  
前侍中封隆之擬山東兵七萬突騎五萬以征江左皆  
約所部伏聽處分

又自理表

臣為嬖佞所間陛下一旦賜疑令猖狂之罪爾朱時計  
臣若不盡誠竭節敢負陛下則使身受天殃子孫殄絕  
陛下若垂信赤心使干戈不動佞臣二人願斟量廢  
出

與魏彭城王韶書

韶字世胄襲祖勰封武定  
末司州牧齊受禪降爵

孟業字敬業鉅鹿安國人韶拜定州業為典  
籤長史性廉謹尋出外行縣事高祖書責韶

典籤姓孟者極能用心何不置之目前

北齊書 北史  
作何乃今出外

也



遺侯淵書

淵神武尖山人斧梁見殺

淵仕魏定州刺史隨爾朱兆拒高祖兆敗從高祖破爾朱氏永熙初除齊州刺史遣使通誠於高祖汝陽王暹既除齊州淵據城不時迎納民劉桃符等潛引暹入城淵率騎出奔妻兒部曲為暹所虜會承制以淵行青州事高祖又遺書淵乃復還暹始歸其部曲

卿勿以部曲輕少難於東邁齊人澆薄惟利是從齊州城民尚能迎汝陽王青州之民豈不能開門待卿也但

當勉之

魏書

賜盧勇書

勇字李禮范陽涿人

卷一  
勇東魏元象中以功授儀同三司揚州刺史  
鎮宜陽叛民韓木蘭陳忻等常為邊患勇大  
破之欲求入朝  
高祖賜勇書

吾委卿揚州惟安枕高卧無西南之慮矣但依朝廷所  
委表欲宜停卿之妻子任在州住當使漢兒之中無在  
卿前者

### 與鄴下諸貴書

崔暹字李倫博陵高平人魏武定初為御史  
中尉前後表彈尚書令司馬子如及尚書元  
羨雍州刺史慕容獻又彈成陽王坦并州刺  
史可朱渾道元並免官其餘死黜者甚衆高

祖書與鄴下諸貴  
進人齊歷右僕射

崔暹昔事家弟為定州長史後吾兒開府諮議及遷左  
丞吏部郎吾未知其能也始居憲臺乃爾糾劾咸陽王  
司馬令並是吾對門布衣之舊尊貴親昵無過二人同  
時獲罪吾不能救諸君其慎之

並北齊書

### 招王思政書

東魏丞相歡擊西魏入自汾絳連營四十里  
丞相泰使王思政守玉壁以斷其道歡以書  
招思政思政復書歡圍玉壁凡九日遇大雪  
士卒飢凍遂解圍去是年十一月以可朱渾

道元為并州刺史 道元名元遼東人為魏渭州刺史歸齊歷位太師

若降當授以并州

王思政復書

字思政太原祁人魏大將軍拒齊文襄敗歸齊為都官尚書

可朱渾道元降何以不得

資治通鑑

敕子澄書

尚書令司馬子如以丞相歡故人常任意氣自高與太師咸陽王坦貪黷無厭遲前後彈子如坦及并州刺史可朱渾道元等罪狀無不極筆宋遊道亦劾子如坦及太保孫騰司徒高隆之司空侯景尚書元羨等澄叔子如繫獄一宿髮盡白辭曰司馬子如從夏州策

杖投相王王給露車一乘齋牀牛犢犢在道  
死唯齋角存此外皆取之於人丞相歡以書  
教澄澄駐馬行街出  
子如脫其鎖削官爵

馬令是吾故舊汝宜寬之

北史 通鑑司馬令吾之故舊

文襄帝高澄

字子惠神武長子襲為大丞相為奴  
蘭京所殺追尊文襄皇帝廟曰世宗

密與高隆之書

隆之字延興高平金鄉人魏太  
保入齊錄尚書事領大宗正

高仲密之將叛也陰遣人扇動冀州豪傑使  
為內應東魏遣高隆之馳驛慰撫由是得安  
澄密書與隆之隆之以為恩旨既  
行理無追改乃欲丞相歡而罷之

仲密杖黨與之俱西者宜悉收其家屬以懲將來

資治通鑑

與侯景書

景初為北鎮戍兵事爾朱榮以戰功推定州刺史大行臺封濮陽郡公神武帝為魏相誅爾朱氏景以衆降神武仍為所用馭軍嚴整所向多捷摠攬兵權與神武相亞魏以為司徒南道行臺專制河南及神武疾篤謂文襄曰景我死後必不為汝用為書召景景懼及禍舉河南附梁神武薨文襄遣慕容紹宗圍景于長社景復請西魏為援大襄慮景與西南合從方為已患乃以書喻景景答之

益聞位為大寶守之未易仁誠重任終之實難或殺身成名或去食存信比性命於鴻毛方義節於熊掌夫然

者舉不違德動無過事進不見惡退無謗言先王與司  
徒契閭夷險孤子相依偏所眷屬繾綣襟期綢繆素分  
義貫終始情存歲寒司徒自少及長從微至著共相成  
立生非無恩既爵冠通侯位標上等門容駟馬食饗萬  
鍾財利潤於鄉黨榮華被於親戚意氣相傾人倫所重  
感於知己義在忘軀眷為國士者乃立漆身之節饋以  
壺飧者便致扶輪之效若然尚不能已況其重於此乎  
幸以故舊之義欲持子孫相託方為秦晉之匹共成劉

范之親假使日往月來時移世易門無強蔭家有幼孤  
猶應加璧不遺分宅相濟無忘先德以恤後人況聞負  
杖行歌便已狼顧犬噬於名無所成於義無所取不蹈  
忠臣之迹自陷叛人之地力不足以自彊勢不足以自  
保率烏合之衆為累卵之危西求救於黑秦南請援於  
蕭氏以狐疑之心為首鼠之事入秦則秦人不容歸吳  
則吳人不信當今所觀未見其可不知終久持此安歸  
相推本心必不應爾當是不逞之人曲為異端之說遂



懷市虎之疑乃致投杼之惑比來舉止事已可見人相  
疑誤想自覺知闔門大小並在司冠意謂李氏未滅猶  
言少卿可反孤子無狀招禍丁天酷罰不能死亡苟存  
晷漏追慕永遠五內崩裂但禮由權奪志在忘私思効  
力命卒成功業近者聊命偏師前驅致討南兗揚州應  
時尅復即欲乘機長驅懸瓠屬以炎暑欲為後圖且命  
旋軍待時更舉今寒飈向折白露將團方憑國威龔行  
天罰器械精新士馬強盛內外感恩上下戮力三令五

申可蹈湯火若使旗鼓相望埃塵相接勢如沃雪事等  
注熒夫明者去危就安智者轉禍為福寧使人負我不  
使我負人當開從善之門使有改迷之路今誠刷心蕩  
意除嫌去惡想猶致疑未便見信若能卷甲來朝鞭弓  
還關者當相授豫州刺史以終身世所部文武並不追  
攝進得保其祿位退則不喪功名冀有知幾之心當為  
可信之事今王思政韋法寶等孤軍偏將遠來深入然  
其性命在君股掌若欲刺之想有餘力若能擒翦肆諸

市朝即加寵授永保疆場君門眷屬可以無恙寵妻愛  
子亦相送還仍為通家共成親好所不食言有如皎日  
今遣行人路程可度此月十日應至彼間足得還返若  
能悔過不忘本朝宜遣腹心之使自來向此面取委曲  
使相知信如其遲疑未便分決使來賒緩不赴期會國  
有常刑以明君法今君不能東封函谷南面稱孤受制於  
人威名頓盡得地不能自守聚衆不以為彊空使身有  
背叛之名家為惡逆之黨兄弟子姪首足異處垂髮戴

白同就塗炭聞者相為酸鼻見者相為寒心覆宗絕嗣  
自貽伊慼戴天履地之心能無愧乎成敗禍福決之此  
使善惡向背相任所從脫出自思致延後悔駟馬不追  
噬臍何及孤子今日不應乃遣此書但見蔡遵道云司  
徒本無歸惡之心深有追悔之意聞西兵將至遣遵道  
向嶠中叅其多少少則與其同力多則更為之備又云  
房長史在彼之日司徒嘗欲遣書啟將改過自新求効  
邊畔已差李龍仁等垂欲發遣聞房已還遂復停廢未

知遵道此言為實為虛但既有所聞不容不相盡告吉

凶之理想自圖之

文苑英華 梁書方作等違作失素  
分作寤語共相成立生非無恩作共

相成生非無恩德食作室異作口虎作獸惑下有耳字  
並在作並付國威作國靈感恩作感德戮力作齊心焚  
作螢寧使人負我不使我負人作寧使我負人不使人  
負我使有作決改報弓作垂索以終身世作即使終君  
之世並作更相送作送相兄弟上有空使二字首足異  
處作足首異門同就作同之寒心下云矧伊骨肉能無  
愧也乃遣作方遣歸惡作歸西追悔作悔過之備作其  
備已還作已遠為實為虛作為虛為實 北齊書卷為  
作待為壺殮作一殮幸以作常以欲持作欲將犬噬作  
反噬之迹作之路自陷作便陷求救作取救黑秦作字  
文異端作無端並在作悉在耶命偏師作耶遣偏裨長  
驅作席卷且命旋軍作且令還師寒飈作寒膠可蹈作

可赴之門作之塗當相投二句作即當投豫州必使終  
君身世孤軍作孤单股掌作掌握若欲刺之作脫能刺  
之即如寵授作即相加授無恙作無患得地不能自守  
作得地不欲自守家為惡逆之黨作家有惡逆之禍歸  
惡作西歸此  
言作此語

### 侯景報文襄書

文襄覽書問為誰作或曰其行臺郎王偉  
文襄曰偉才如此何因不使我知大襄欲  
問景於梁又與景書而謬其辭云本使彼  
陽叛欲與圖西人知之故景更與圖南  
為事漏其書於梁  
梁人亦不之信

蓋聞立身揚名者義也在躬所寶者生也苟事當其義

則節士不愛其軀刑罰斯舛則君子實重其命昔微子  
發狂而去殷陳平懷智而背楚者良有以也僕鄉曲布  
衣本卑藝用初逢天柱賜忝帷幄之謀晚遇永熙委以  
干戈之任出身為國綿歷二紀犯危履難豈避風霜遂  
得躬被袞衣口餐玉食富貴當年光榮身世何為一旦  
舉旌旆援桴鼓而北面相抗者何哉實以畏懼危亡恐  
招禍害捐軀非義身名兩滅故耳何者往年之暮尊王  
邁疾神不祐善祈禱莫瘳遂使嬖幸擅威權閹寺肆詭

惑上下相猜心腹離貳僕妻子在宅無事見圍段康之  
誅莫知所以盧潛入軍未審何故翼翼小心常懷戰慄  
有覩面目寧不自疑及迴師長社希自陳狀簡書未達  
斧鉞已臨旣旌旗相對咫尺不送飛書每奏兼申鄙情  
而羣卒恃雄眇然不顧運戟摧鋒專欲屠滅築圍堰水  
三板僅存舉目相看命懸晷刻不忍死亡出戰城下禽  
獸惡死人倫好生送地拘秦非樂為也但尊王平昔見  
與比肩共獎帝室雖形勢參差寒暑小異丞相司徒鴈



行而已福祿官榮自是天爵勞而後受理不相干欲求  
吞炭何其謬也然竊人之財猶謂為盜祿去公室相為  
不取今魏德雖衰天命未改祈恩私第何足闕言賜示  
不能東封函谷受制於人當似教僕賢榮仲而褒季氏  
無主之國在禮未聞動而不法何以取訓竊以分財養  
幼事歸令終捨宅存孤誰云隙末復言僕衆不足以自  
強危如累卵然紂有億兆夷人卒降十亂桀之百尅終  
自無後潁川之戰即是殷監輕重由人非鼎在德苟能

忠信雖弱必彊殷憂啟聖處危何苦況今梁道邕熙招  
携以禮被我虎文縻之好爵方欲苑五岳而池四海掃  
夷穢以拯黎元東羈甌越西通汧隴吳楚剽勁帶甲千  
羣秦兵冀馬控弦十萬兼僕所部義勇如林奮義取威  
不期而發大風一振枯幹必摧凝霜暫落秋蒂自殞此  
而為弱誰足稱彊又見誣兩端受疑二國斟酌物情一  
何至此昔陳平背楚歸漢則王百里出虞入秦斯霸蓋  
昏明由主用捨在時奉禮而行神其庇也書稱士馬精

新剋日齊舉誇張形勝指期蕩滅竊以寒颼白露節候  
乃同秋風揚塵馬首何異徒知北方之力爭未識西南  
之合從苟欲徇意於前途不覺坑穽在其側若云去危  
令歸正朔轉禍以脫網羅彼既嗤僕之愚迷此亦笑君  
之晦昧今已引二邦揚旌北討熊虎齊奮剋復中原荆  
襄廣潁已屬闕右項城懸瓠亦奉南朝幸自取之何勞  
恩賜然權變不一理有萬途為君計者莫若割地兩和  
二分鼎峙燕衛晉趙足相俸祿齊曹宋魯悉歸大梁使

僕得輸力南朝北敦姻好束帛交行戎車不動僕立當  
世之功君卒祖禰之業各保疆界躬享歲時百姓乂寧  
四民安堵孰若驅農夫於隴畝抗勅敵于三方避干戈於  
首尾當鋒鏑於心腹縱太公為將不能獲存歸之高明  
何以克濟復尋來書云僕妻子悉拘司寇以之見要庶  
其可反當是見疑褊心未識大趣何者昔王陵附漢母  
在不歸太上因楚乞羹自若矧伊妻子而可介意脫謂  
誅之有益欲止不能殺之無損徒復坑戮家累在君何

關僕也而遵道所傳頗亦非謬但在縲紲恐不備盡故  
重陳辭更論款曲所望良圖時惠報旨然昔與盟主事  
等琴瑟讒人間之翻為讎敵撫弦搦矢不覺傷懷裂帛

還書知何能述

梁書 鄉曲北齊書作鄉一二紀作一  
紀光榮作榮華桴鼓作鼓桴篳幸擅威

權四句作僻幸弄權心腹離貳迴師作迴歸未達作未  
遣不送作不遠蕪申作蕪申羣卒作羣帥不顧作弗顧  
築園作掘園三板僅存作董存三板晷刻作漏刻送地  
拘秦一段作云拘秦逆地豈樂為之禽獸惡死人倫好  
生僕實不辜桓莊何罪且尊王平昔見與比肩戮力同  
心共獎帝室雖復權勢參差寒暑小異必相司徒鴈行  
而已為盜作之盜相為作抑謂祈恩作拜恩賜示作賜  
嗤褒作哀何以取訓作將何以訓危如作身危如夷穢

作氛穢吳楚剽勁作吳越悍勁稱彊作稱雄至此作太  
甚則王作則彊在時作在人神其庇也作神其吐耶勝  
作勢指期蕩滅作必欲相滅寒颼作寒膠若云二句作  
去危就安今歸正朔轉禍為福已脫網羅彼既作彼當  
南朝作江南恩賜作見援不一作非一二分作三分晉  
趙作趙晉交行作自行不動作不駕祖禰作父禰疆界  
作疆壘躬享作聽享民作人獲存作復存云作曰僕妻  
子悉拘司寇作妻子老幼悉在司寇以之作以此殺之  
作救之徒復作復加所傳作所說非謬作非虛知何作  
其何景初為北鎮戍兵稍立功效天柱將軍爾朱榮  
自晉陽入弑胡太后景以私衆見榮榮  
甚奇景委以軍事永熙魏孝武年號

### 與崔李舒書

李舒字叔正博陵安平人歷侍中  
開府加特進後主時被讒坐誅

魏孝靜帝好文學美容儀多力善射有孝文  
風文襄甚忌焉大將軍中兵叅軍崔李舒為

中書黃門侍郎令監察動靜小  
大皆令李舒知丈襄與李舒書

癡人復何似癡勢小差未

魏書 通鑑末  
云宜用心檢校

答李元忠書

元忠趙郡柏人人仕魏為  
太常卿入齊領衛尉卿

元忠除驃騎大將軍儀同三司嘗貢世  
宗蒲萄一盤世宗報以百練纈遺其書

儀同位亞台鉉識懷貞素出藩入侍備經要重而猶家  
無擔石室若懸磬豈輕財重義奉時愛已故也久相嘉  
尚嗟咏無極恒思標賞有意無由忽辱蒲萄良深佩戴  
聊用絹百疋以酬清德也

# 降劉禕書

禕字彥英彭城人魏孝昌中釋巾太學博士  
累遷睢州刺史邊人服其威信甚得疆場之  
和世宗輔政降書褒  
獎秩滿竟歸鄉里

以卿家世忠純奕代冠冕賢弟賢子並與吾共事懷抱  
相託亦自依然宜勗心力以副所委莫慮不富貴並北齊書

判宋遊道

遊道除御史中尉東萊王道習參御  
史選限外投狀遊道與道習有舊受

之文襄怒杖  
而判之曰

遊道稟性獷悍是非肆口吹毛洗垢瘡疵人物往與郎



中蘭景雲忿競列事十條及加推窮便是虛妄方共道  
習凌侮朝典法官而犯持是難原宜付省科

文宣帝

名洋字子進神武次子文襄被弑代為丞相齊郡王篡東魏自立國號齊都鄴在位

十年廟  
曰顯祖

即位告天文

魏收  
撰

皇帝臣諱敢用玄牡昭告于皇皇后帝否泰相沿廢興  
迭用至道無親應運斯輔上覽唐虞下稽魏晉莫不先  
天揖讓考厯歸終魏氏多難年將三十孝昌已後內外

去之世道橫流蒼生塗炭賴我獻武拯其將溺三建元首再立宗桃掃絕羣凶芟夷奸宄德被黔黎勲光宇宙文襄嗣武尅構鴻基功浹寰宇威陵海外窮髮懷音西寇納款青丘保候丹穴來庭扶翼危機重匡頽運是則有大造于魏室也魏帝以卜世告終上靈厭德欽若昊天允歸大命以禪于臣諱夫四海至公天下為一摠民宰世樹之以君既川岳啟符人神效祉羣公卿士八方兆庶僉曰皇極乃顧于上魏朝推進於下天位不可以

暫虛遂逼羣議恭膺大典猥以寡薄託于兆民之上雖  
天威在顏咫尺無遠循躬自省實懷祇惕敬簡元辰升  
壇受禪肆類上帝以答萬國之心永隆嘉祉保佑有齊  
以被于無窮之祚

天保元年大赦詔

藝文作邢邵為受禪登  
極赦詔多齊書六句

無德而稱代刑以禮不言而信先春後秋故知惻隱之  
化天人一揆弘宥之道今古同風朕以虛薄功烈無紀  
昔先獻武王值魏世不造四海幅裂九鼎行出祭器無

歸乃驅御侯伯大號燕趙拯厥顛墜俾亡則存大襄王  
外挺武功內資明德纂戎先業闢土服遠年踰二紀世  
歷兩都獄訟有適謳歌斯在故魏帝俯遵歷數爰念褰  
裳遠取唐虞終同脫屣實幽憂未已志在陽城而羣公  
卿士誠守愈切遂屬代終居于民上如涉深水有睠終  
朝始發晉陽九尾呈瑞升壇告天赤雀効祉惟爾文武  
不貳心之臣股肱爪牙之將左右先王克隆大業永言  
誠節共斯休祉然三皇存教非易可免七名改號庸可

庶幾思與億兆同始茲日其大赦天下改武定八年為

天保元年其百官進階男子賜爵鰥寡六疾義夫節婦

旌賞各有差

代藝文作化之化作之心天人作天地虛作寡則存作若存爰念作念在瑞作祥克

作光誠烈作誠節共斯休社作共茲休慶

### 崇儉詔

頃者風俗流宕浮競日滋家有吉凶務求勝異婚姻喪

葬之費車服飲食之華動竭歲資以營日富人奴僕帶

金玉婢妾衣羅綺始以刑出為奇後以過前為麗上下

貴賤無復等差今運屬惟新思蠲徃弊反朴還淳納民軌物可量事具立條式使儉而獲中

復渤海四郡詔

元年

冀州之渤海長樂二郡先帝始封之國義旗初指之地并州之太原青州之齊郡霸業所在王命是基君子有作貴不忘本思申恩洽蠲復田租齊郡渤海可並復一年長樂復二年太原復三年

祭慰故太傅孫騰等詔

故太傅孫騰故太保尉景故大司馬婁昭故司徒高敖  
曹故尚書左僕射慕容紹宗故領軍万俟干故定州刺  
史段榮故御史中尉劉貴故御史中尉竇泰故殷州刺  
史劉豐故濟州刺史蔡雋等並左右先帝經贊皇基或  
不幸早徂或殞身王事可遣使者就墓致祭并撫問妻  
子慰逮存亡

奏聞文啟詔

自今已後諸有文啟論事并陳要密有司悉為奏聞

出魏御府珍綵詔

古人鹿皮為衣書囊成帳有懷盛德風流可想其魏御府所有珍奇雜綵常所不給人者徒為畜積命宜悉出送內後園以供七日宴賜

修立黌序詔

郡國修立黌序廣延髦俊敦述儒風其國子學生亦仰依舊詮補服膺師說研習禮經往者文襄皇帝所建蔡邕石經五十二枚即宜移置學館依次修立



賞直言詔

有能直言正諫不避罪辜謇謇若朱雲諤諤若周舍開  
朕意沃朕心弼予一人利兼百姓者必當寵以榮祿待  
以不次

又詔

諸牧民之官仰專意農桑勤心勸課廣收天地之利以  
備水旱之災

條錄文籍詔

元年  
七月

朕以虛寡嗣弘王業思所以贊揚盛績播之萬古雖史官執筆有聞無墜猶恐緒言遺美時或未書在位王公文武大小降及民庶爰至僧徒或親奉音旨或承傳傍說凡可載之文籍悉宜條錄封上

定麟趾格詔

元年七月

魏世議定麟趾格遂為通制官司施用猶未盡善可令羣官更加論究適治之方先盡要切引綱理目必使無遺未成之間仍以舊格從事

更加論究北史作更論討新令

發遣梁民詔

梁國遘禍主喪臣離過彼炎方盡生荆棘興亡繼絕義  
在于我納以長君拯其危弊比送梁主已入金陵藩禮  
既修分義方篤越鳥之思豈忘南枝凡是梁民宜聽反  
國以禮發遣

併省州郡詔

天保  
七年

崑山作鎮厥號神州瀛海為池是稱赤縣烝民乃粒司  
牧存焉王者之制沿革迭起方割成災筆分十二水土

既平還復九州道或繁簡義在通時殷因于夏無所改  
作然則日月躔于天次王公國于地野皆所以上叶玄  
儀下符川嶽逮于秦政鞭撻區寓罷侯置守天下為家  
洎兩漢承基曹馬屬統其間損益難以勝言魏自孝昌  
之季數鍾澆否祿去公室政出多門衣冠道盡黔首塗  
炭銅馬鐵脛之徒黑山青犢之侶梟張晉趙豕突燕秦  
綱紀從絃而頽彛章因此而紊是使豪家大族鳩率鄉  
部託跡勤王規自署置或外家公主女謁內成昧利納

財啓立州郡離大合小本逐時宜剖竹分符蓋不獲已  
牧守令長虛增其數求功錄實諒足為煩損害公私為  
弊殊久既非為政之禮徒有驅羊之費自爾因循未遑  
刪改朕寅膺寶歷恭臨八荒建國經野務存簡易將欲  
鎮躁歸靜反薄還淳苟失其中理從刊正傍觀舊史逃  
聽前言周曰成康漢稱文景編戶之多古今為最而丁  
口減於疇日守令倍於昔辰非所以馭俗調風示民軌  
物且五嶺內賓三江廻化拓土開疆利窮南海但要荒

之所舊多浮僞百室之邑便立州名三戶之民空張郡  
目譬諸木犬猶彼泥龍循名責實事歸烏有今所併省  
一依別制

祀禮詔

天保七年 北  
史八年八月

丘郊禘祫時祀皆仰市取少牢不得割割有司監視必令  
豐備農社先蠶酒肉而已雩禱風雨司民司祿靈星雜  
祀果餅酒脯唯當務盡誠敬義同如在

贈陳元康詔

元康歷事神武大襄並見任待大  
襄將受禪為膳奴蘭京所殺時元

康在坐以身扞敵被刺傷卒  
明年文宣即位詔追贈之

元康識超往哲才極時英千仞莫窺萬頃難測綜核戎  
政彌綸霸道草昧召陵之謀翼贊河陽之會運籌定策  
盡力盡心進忠補過亡家徇國掃平逋寇廓清荆楚申  
甫之在隆周子房之處盛漢曠世同規殊年共美大業  
未融山陂奄及悼傷既切宜崇茂典贈使持節都督冀  
定瀛殷滄五州諸軍事驃騎大將軍司空公冀州刺史  
追封武邑縣一千戶舊封並如故謚曰文穆賻物一千

二百段大鴻臚監喪事凶禮所須隨由公給

王昕削爵詔

大宣踐阼昕拜七兵尚書封宜君縣男帝以昕疏誕非濟世才又有

譏昕每嗟水運不應  
遂絕乃下詔徙幽州

元景本自庸才素無勲行早霑纓紱遂履清途發自畿  
邦超居詹事俄佩龍文之劔仍啟帶礪之書語其器分  
何由到此誠宜清心勵已少酬萬一尚書百揆之本庶  
務攸歸元景與奪任情威福在已能使直而為枉曲反  
成彊害政損公名義安在偽賞擯擲之味好詠輕薄之



篇自謂模擬倉楚曲盡風制推此為長餘何足取此而不繩後將焉肅在身官爵宜從削奪

北史

與梁太尉王僧辯書

梁國不造禍難相仍侯景傾蕩建業武陵彎弓巴漢卿志格玄穹精貫白日戮力齊心芟夷逆醜凡在有情莫不嗟尚況我隣國緝事言前而西寇承間復相掩襲梁主不能固守江陵殞身宗祏王師未及便已降敗士民小大皆畢冠虜乃睠南顧憤歎盈懷卿臣子之情念當

鯁髮如聞權立夫子號令江陰年甫十餘極為冲藐梁  
釁未已負荷諒難祭則衛君政由甯氏幹弱枝彊終古  
所忌朕以天下為家大道濟物以梁國淪滅有懷情好  
存亡拯墜義在今辰扶危嗣事非長伊德彼貞陽侯梁  
武猶子長沙之胤以年以望堪保金陵故置為梁主納  
于彼國便詔上黨王渙摠攝羣將扶送江表雷動風馳  
助掃寇逆清河王岳前救荆城軍度安陸既不相及憤  
惋良深恐及西寇乘流復躡江左今轉次漢口與陸居

士相會卿宜協我良規厲彼羣帥部分舟艫迎接今王  
鳩勒勁勇并心一力西羌烏合本非勍寇直是湘東怯  
弱致此淪胥今者之師何往不尅善建良圖副朕所望  
也

梁書

### 與崔暹書

暹字季倫博陵安平人歷右僕射

進遷太常卿世宗欲以妹嫁暹子而會帝崩  
遂寢至是羣臣宴于宣光殿貴戚之子多在  
焉顯祖于坐上親作書與暹乃以公主降暹  
子達拏達拏少歷職司農入周謀反伏誅

賢子達拏甚有才學亡兄女樂安主魏帝外甥内外敬

待勝朕諸妹思成大兄宿志

北齊書

孝昭帝

名演字延安神武第六子初封常山王廢  
文宣子殷自立在位二年墜馬死廟曰肅

宗

封先代後詔

皇建元年

昔武王剋殷先封兩代漢魏二晉無廢茲典及元氏統  
歷不率舊章朕纂承大業思弘古典但二王三恪舊說  
不同可議定是非列名條奏其禮儀體式亦仰議之

漢魏

二晉北史作  
兩漢魏晉

詔王晞

晞見後

帝初封常山王為丞相輔政晞以司馬領吏部郎中丞相從事中郎勸王自立踐阼詔晞

何為自同外客略不可見自今假非局司但有所懷隨

宜作一牒候少隙即徑進也

並北齊書北史晞因奏事罷帝從容曰云云不言

是詔

敕崔瞻

瞻見後

孝昭踐阼太子就傅受業除瞻太子中庶子徵赴晉陽敕之瞻專在東宮調護講讀及進

退禮度皆歸委焉

東宮弱年未陶訓義卿儀形風德人之師表故勞卿朝夕游處開發幼蒙一物三善皆以相寄

北史

遺詔

皇建二年

朕嬰此暴疾奄忽無逮今嗣子冲眇未開政術社稷業重理歸上德右丞相長廣王湛研機測化體道居宗人雄之望海內瞻仰同胞共氣家國所憑可遣尚書左僕射趙郡王叡喻旨徵王統茲大寶其喪紀之禮一同漢丈三十六日悉從公除山陵施用務從儉約

與長廣王湛書

孝昭臨終詔追長廣王  
湛入纂大統手書云

宜將吾妻子置一好處勿學前人也

入書

孝昭第二子百年立為皇太子臨崩詔傳位  
於武成并有手書其末云太寧中百年封樂  
陵王河清二年白虹圍日赤  
星見遂以事殺百年厭之

百年無罪汝可以樂處置之勿學前人

並北齊書

武成帝

名湛神武第九子在位五  
年禪位太子緯廟曰世祖

輕罰詔

武成于刑律思存輕典太  
寧元年乃下詔

隋書

王者所用唯在賞罰賞貴適理罰在得情然理容進退  
事涉疑似盟府司勲或有開塞之路三尺律令未窮盡  
一之道想文王之官人念宜尼之止訟刑賞之宜思獲  
其所自今諸應賞罰皆賞疑從重罰疑從輕

敕馮翊王潤

字子澤神武  
第十四子

潤為定州刺史習於吏職開府王廻洛與六  
州大都督獨孤枝侵占官田受納賄賂潤按  
舉其事二人表言王出送臺使登魏文舊壇  
南望歎息不測其意武成使元文遙就州宣



敕於是迴洛決鞭二  
百獨孤枝決杖一百

馮翊王少小謹慎在州不為非法朕信之熟矣登高遠  
望人之常情鼠輩欲橫相間搆曲生眉目

與河南王孝瑜手勅

孝瑜字正德文襄長  
子為武成所酖死

孝瑜養于神武宮中與武成同年相愛將誅  
楊愔等孝瑜預其謀及即位禮遇特隆帝在  
晉陽手  
勅與之

吾飲汾清二盃勸汝於鄴酌兩盃

勅和士開

士開字彥通清都臨漳人封淮陽  
王除尚書令為瑯邪王儼所誅

士開以輕巧便僻為武成所親寵累遷給事  
黃門侍郎除侍中加開府遭母憂帝手勅慰  
諭之

朕之與卿本同心腹今懷抱痛割與卿無異當深思至

理以自開慰

並北齊書

後主

名緯字仁綱武成長子在位十二年為周人所執見殺

與任城王湝書

周伐齊後主敗奔鄴憲進尅鄴城湝與廣寧  
王孝珩據守信都有衆數萬高祖復詔憲討  
之仍令齊主手書與湝湝不納憲軍過趙州  
執湝間諜二人放還乃與湝書湝戰敗被擒

朝廷遇緯甚厚諸王無恙叔若釋甲則無不優待

周書

北齊元會詔書

北齊元會日侍中慰勞郡國吏又頒五條詔書寫以牘版宣示

使歸告

刺史

一曰政在正身愛人去殘賊擇良吏正決獄平徭賦二  
曰人生在勤勤則不匱其勸率田桑無或煩擾三曰六  
極之人務加寬養必使生有以自牧沒有以自終四曰  
長吏浮華奉客以求小名逐末捨本政之所疾宜謹察  
之五曰人事意氣干亂奉公內外混淆紀綱不設所宜

紀効杜氏  
通典

任城王潛神武第十子齊殺入  
周同後主並見殺

與尚書令楊遵彥論李德林書

天保中潛為定州刺史召德林入州館朝夕  
同游殆均師友于是舉秀才入鄴因遺遵彥  
書時遵彥銓衡深慎選舉秀才罕有甲科  
德林射策五條考皆為上投殿中將軍

燕趙固多奇士此言誠不為謬今歲所貢秀才李德林  
者文章學識固不待言觀其風神器宇終為棟梁之用  
至於經國大體是賈生鼂錯之儔雕蟲小技殆相如子

雲之輩今雖唐虞君世俊人盈朝然修大厦者豈厭夫  
良材之積也吾嘗見孔文舉薦禰衡表云洪水橫流帝  
思俾乂以正平比夫大禹常謂擬諭非倫今以德林言  
之便覺前言非大

隋書

安德王延宗

文襄第五子

即位詔

周攻齊後主奔鄴以延宗為并州刺史在并將帥請即帝位

武平孱弱政由宦豎疊結蕭牆盜起疆場斬關夜遁莫  
知所之則我高祖之業將墜于地王公卿士猥見推逼

今便祇承寶位可大赦天下改武平七年為德昌元年

### 與任城王潛書

後主奔鄴加潛大丞相及延宗稱尊號于晉陽使劉子昂修啓于潛潛曰我人臣何容受此啓執子昂送鄴延宗為周武帝所執尋與後主並賜死

至尊出奔宗廟既重羣公勸迫權主號令事寧終歸叔

父

北齊書

清河王岳傳岳高祖從父弟初與高祖經綸天下家有私兵並畜戎器諸甲千餘領世宗之末表求納之世宗敦至親之重推心相任云叔屬居肺腑職在維城所有之甲本資國用叔何疑而納之按此本非

書尺牘  
亦載

范陽王紹義

大宣第三子

遺妃書

紹義為定州刺史周兵至戰敗奔突厥周人購而執之流于蜀妃渤海封孝琬女自突厥逃還紹義在蜀遺妃書竟死蜀中

蠻夷無信送吾於此

周書

南安王思好

本浩氏子上洛王思宗養以為弟

與并州諸貴書

思好累遷尚書令朔州刺史南安王甚得邊  
朔人心後主時斫骨光升奉使至州思好迎  
之甚謹光升倨傲思好銜之武平五年舉兵  
反與并州諸貴書行臺郎王行思之辭也軍  
敗與行思  
投水死


主上少長深宮未辨人之情僞昵近兇狡疎遠忠良遂  
使刀鋸刑餘貴溢軒階商胡醜類擅權帷幄剝削生靈  
劫掠朝市闇于聽受專行忍害幽母深宮無復人子之  
禮二弟殘戮斷絕孔懷之義仍縱子立奪馬于東門光  
弁擎鷹于西市蛟龍得儀同之號逍遙受郡君之名犬



馬班位榮冠軒冕人不堪役思長亂階趙郡王叡實曰  
宗英社稷惟寄左丞相斛律明月世為元輔威著隣國  
無罪無辜奄見誅殄孤既忝預皇枝實蒙殊獎今便擁  
率義兵指除君側之害幸悉此懷無致疑惑

北齊書  
北史作

制字無罪無辜  
作並非有辜



北齊文紀卷一

欽定四庫全書

集部

北齊文紀卷二

詳校官中書<sub>臣</sub>朱文翰

主事銜<sub>臣</sub>徐以坤覆勘

總校官進士<sub>臣</sub>楊懋珩

校對官典簿<sub>臣</sub>郭祚熾

謄錄監生<sub>臣</sub>連彭年

欽定四庫全書

北齊文紀卷二

明梅鼎祚編

高乾

字乾邕渤海蓆人歷徐州刺史賜死

致喪詠之書

詠之字士正沛王大司馬記室入周為大行臺倉曹郎中

乾為司空致書詠之復書不受署

相屈為戶曹叅軍

北齊書

郭秀

范陽涿郡人為高祖行臺右丞

致楊愔書

惜從兄幼卿為岐州刺史以直言見誅惜哀  
感發疾後取急就鴈門溫湯療疾秀素害其  
能因致書恐之仍勸其逃亡惜變姓名自稱  
劉士安入嵩山又東入田橫島神武知惜存  
齋書慰喻除太  
原公開府司馬

高王欲送卿於帝所

北齊書

破六韓常

字保年附化人匈奴單于之裔歷拜太保滄州刺史

啓世宗

常為洛州刺史啓世宗世宗納其計遣大司馬斛律金等築楊志百家呼延三鎮

常自鎮河陽以來頻出關口太谷二道北制已北洛州

已南所有要害頗所知悉而太谷南口去荊路踰一百  
經赤工坂是賊往還東西大道中間曠絕一百五十里  
賊之糧餉惟經此路愚謂於彼選形勝之處營築城戍  
安置士馬截其遠還自然不能更有行送

北齊書

杜弼

字輔玄中山曲陽人歷任膠州刺史

### 遺張普惠書

普惠魏諫議大夫時靈太后父司徒胡國珍  
薨贈相國太上泰公普惠以前世后父無太  
上之號疏陳不可尋復密表太后親至國珍  
宅召集王公八座庶尹及五品以上博議其

事召普惠與相問答令依前詔於是辭還初  
普惠被召馳驛驅馬來甚迅速佇令催去諸  
子憂怖及議罷旨勞還宅親故賀其  
幸甚弼遺之書普惠美之每為口實

明侯淵儒碩學身負大才秉此公方來居諫議蹇蹇如  
也諤諤如也一昨承胡司徒第當面折庭諍雖問難鋒  
至而應對響出宋城之帶始縈魯門之析裁驚終使羣  
后逡巡庶寮拱默雖不見用於一時固已傳美於百代  
聞風快然敬裁此白

魏書 淵北史作深秉作執  
當面折庭諍作當庭面諍

### 與邢邵書

郗嘗與郗扈從東山共論名理大略郗以為  
人死則神滅不復還生弼謂神不係於形孰  
云俱滅去此託彼生生具在其後又別  
與郗書前後往復再三郗理屈而止

夫建言明理宜出典證而違孔背釋獨為君子若不師  
聖物各有心馬首欲東誰其能禦奚取於適喪何貴于  
得一逸韻雖高管見未喻

北齊書

檄梁文

梁武帝太清元年為魏孝靜帝武定五  
年魏司徒侯景反初降西魏帝實炬請

師復背歸梁武帝署景河南大將軍乃遣兄  
子貞陽侯淵明等過徐州為景聲援齊文襄  
遣行臺慕容紹宗率衆討之紹宗檄梁境內  
因大破梁軍擒淵明等景叛渡江陷臺城



夫乾坤交泰明聖興作有冥運行之力俱盡變化之途  
抱識含靈融然並至呈形賦命混而同往所以玄功潛  
運至德旁通百姓日用而不知萬國受賜而無迹豈徒  
鑿其耳目易其心慮悟以風雲一其文軌使夫日月之  
照不私雨露之施均洽運諸仁壽之域納於福祿之林  
自晉政多僻金行淪蕩中原作戰鬪之場生民為鳥獸  
之餌則我皇魏握玄帝之圖納水靈之祉駕雲車而自  
北策龍御以圖南政符上帝援溺下土怪物殛死淫水

不作運神器於顧盼定寶命於踟躕恢之以武功振之以文德宇內反可封之俗員首識堯舜之心沙海荒忽之外瀚漠羈縻之表方志所不傳荒經所不綴莫不繩谷釣山依風託水共仰中國之聖同欣大道之行唯夫三吳百越獨阻聲教匪民之咎責有由焉自偽晉之後劉蕭作慝僭擅一隅號令自己惟我祖宗馭宇愛民重戰未極謀臣之畫不窮節將之兵聊遣行人降以尺一圓臺已築黃屋輒去賜其几杖置之度外蕭衍輕險有

素士操蔑聞睥睨君親自少而長好亂樂禍惡直醜正  
巧用其短以少為多誑惑愚淺大言以驚俗驅扇邪僻  
口兵以作威曲體脅肩搖唇鼓舌候當朝之顧指邀在  
位之餘論遂汙辱冠帶偷竊藩維及寶卷昏狂下不堪  
命曾無北面有犯之節遽滅人倫在三之禮憑妖假怪  
鬼語人言稱兵拍闕傾朝鴆主陵虐孤寡聾愚士民天  
不悔禍姦醜得志內恣雕靡外逞殘賊驅羸國之兵逼  
鋤口之衆南出五嶺北防九江屯戍不解役無寧歲死

亡矢刃之下天折露霧之中哭泣者無已傷痍者不絕  
託身人上忽下如草遂使頑嚚子弟肆行淫虐狡猾羣  
小縱極貪恠剝割蒼生肌肉略盡剝剔黔首骨髓俱罄  
猛虎未方其害餓狼詎侔其禍慄慄周餘救死無地至  
於矯情飾詐事非一緒毒螫滿懷妄敦戒業躁競盈胃  
謬治清淨至乃大興寺塔廣繕臺堂昭陽倒景垂珠銜  
壁崢嶸刻削千門萬戶鞭撻疲民盡其筋骨延壤運石  
悲歌掩途死而可祈甘同仙化智淺謀疎曾不自揆過

桐栢之流翻為已害子亡齊之肩忽為戎首書契迄茲  
罕聞其事至于廢捐冢嫡崇樹愚子朋黨路開彼我側  
目疾視扼腕十室而九翹足有待良亦多人二紀於茲  
王家多故始則車馳之警終有驚墜之哀神祇痛憤寓  
縣崩震於是故相國齊獻武高王感天壤之慘黷激雲  
雷以慨然仗高義而率民奮大節以成務爰有匡國定  
霸之圖非直討賊雪耻之舉於是睿略紛紜靈武冠世  
濫滌逋孽尊主康邦皇上秉厯受圖天臨日鏡道隨玄

運德與神行既而元首懷舞戚之風上宰薄兵車之會  
遂解紮南冠喻以好睦舟車遵遡川陸光華亭徽相望  
欣然自泰反肉還童不待羊陸雖嘉謀長筭爰自我始  
罷戰息民兩獲其泰王者之信明如四時豈或為人君  
父二三其德書而不法可不惜哉侯景一介役夫出自  
凡賤身名淪蔽無或可紀直以趨馳便習見愛爾朱小  
人叨竊遂忝名位及中興之際義旗四指元惡不赦實  
在羣胡景荷人成拔藉其股肱主人有丹頸之期所天

陷族滅之釁雖不能蔽捍左右以命酬恩猶當慘顏後  
至義形於色而趨利改圖速如覆手投首麾下甘為僕  
隸獻武王側棄其瑕穢錄其小誠得厠五命之末預在  
一隊之後叅跡驅馳庶其來効長鞭利鐔術以制之既  
關隴逋誅每事經略以河南空虛之地非兵戰之衝薄  
存犄角聊示旗鼓豈資實効寄以遊聲軍機催勒蓋惟  
景任總兵統旅別有司存而愚褊有積憤愎遂甚犯違  
軍紀仍自猜貳禍心潛構翻為亂階負恩棄德罔恤天

討不義不昵厚而必顛委慈母如脫屣棄少弟如遺土  
羣子陸陸妻姪成行慕姜兒之爽言蔑伯春之宛轉跳  
梁猖獗夫欲誰欺比之梟獍異類同醜欲擬蛇鼠顧匪  
其倫及遠託關右委命寇逆寶炬定君臣之分黑獺結  
兄弟之親授以名器之尊救其重圍之死憑人繫援假  
人鼻息俄而忘恩背惠親尋干戈釁暴惡盈側首無託  
以金陵逋逃之藪江南流禦之地甘辭卑體進熟圖身  
詭言浮說抑可知矣叛豎救命豈將擇音偽朝大夫幸



災忘義主耄於上臣蔽於下逐雀去草曾不是圖竊寶  
叛邑椒蘭比好人而無禮其能國乎夫安危有大勢成  
敗有恒兆不假離朱之目不藉子野之聽聊陳刺心之  
說且吐伐謀之言今帝道休明皇猷允塞四民樂業百  
靈效祉雖上相云亡而伊陟繼事秉文經武虎視龍驤  
驅日下之俊雄收一世之英銳擊刺猶雷電合戰如風  
雨控弦躍馬固敵是求蠕蠕昔遭離亂輻分瓦解匹馬  
孤征告困于我國家深敦隣附愍其入懷盡憂人之禮

極繼絕之義保衛出于故地資給唯其多少存其已亡之業成其莫大之基深仁厚德鏤其骨髓引領思報義如手足吐谷渾深執忠孝膠漆不渝萬里仰德奏款屬路並申以婚好行禮如歸蠕蠕境斜界黃河望通幽夏飛雪千里曾氷洞積北風轉勁實劭角之時沍寒方猛正氊裘之利吐谷渾疾彼凶逆彊兵歲舉傾河及鄯塵通隴峽驅龍池之種藉常勝之氣二方候隙企其移踵加以獨孤如願擁衆秦中治兵劫脅黑獺北備西擬內

營心腹救首救尾疲于奔命豈暇稱兵東指出師函谷  
且秋風揚塵國有恒防關河形勝之際山川襟帶之所  
猛將精兵基峙岳立又寶炬河陰之北黑獺邙山之走  
衆無一旅僅以身歸就其不顧根本輕懷進趣斯則一  
勞永逸天贊我也言之旦旦日月經天舉世所知義非  
徒語持此量之理有可見則侯景遊辭莫非虛誕夫景  
繩樞席牖之子阡陌鄙俚之夫遭風塵之會逢馳騫之  
日遂位此三吏邑啓千社揣身量分久當止足而乃周

章去就離跂不已夫豈徒爾事可推揚度其衆叛親離  
守死不暇乃聞將棄懸瓠遠赴彭城老賊姦謀復將作  
矣固揚聲赴功計在圖襲吞淵明之衆招厭虐之民舉  
長淮以為斷仍鴟張歲月南面假名死而後已此蓋螾  
鷸之禍我乘其弊且僞主昏悖不惟善隣賊忍之心老  
而彌篤納逋叛之詭譎蔑信義以猖狂天喪其神人重  
其怨將踐瓜圃之蹤且追兜侯之轍今徵發犬羊侵軼  
徐部築壘擁川覬覦小利此而可忍孰不可懷兵凶戰

危出不得已謬奉朝規肅茲九伐扛鼎拔樹之衆超乘  
投石之旅練甲爭途波聚霧合虎班龍文之逸蘭池蒲  
梢之駟噓天陸野躡影追風振旅南轅長驅討賊非直  
三吳鼠面一麾魚駭乘此而徃青蓋將歸且衍虐網蚩  
蚩兵權在外恃險躁之風俗兼輕薄之子孫蕭綸凶狡  
之魁豈無商臣之佞蕭譽失志之憤當召專諸之客外  
崩中潰今也其時幕府師行以禮兵動以義弔民伐罪  
理有存焉其有知機審變翻然鵲起立功立事去危就

安賞典未忘事必加等若軍威所至敢有拒違尺兒已  
上咸從梟戮今三禮四義之將豹虎熊羆之士深銜逋  
偽信納叛亡違卜愎諫實興伐役莫不含怒作色如赴  
私讎茹肝涉血義不旋踵攻戰之日事若有神莽積麻  
亂匪旦伊夕以彼曲師危卒望我軍鋒何異蝘蜥披甲  
蚍蜉舉尾正恐旌鼓一接芝萑俱摧先事喻懷備知翰  
墨王侯無種禍福由人斯蓋丈夫肉食之秋壯士封侯  
之會冬冰可折時不再來凡百君子勉求多福櫟之所

到咸共申省知我國行師之意

魏收撰魏書島夷蕭衍傳文苑英華資治通

鑑所載  
列後

同前

資治通鑑云東魏使軍司杜弼作檄移梁朝其後梁室禍敗皆如弼言北齊書杜

弼傳云梁遣貞陽侯淵明攻彭城魏以大都督高岳行臺慕容紹宗討之詔弼為軍司攝

臺左丞遂破淵明于寒山按此正紹宗使弼為檄也然魏書之文與此僅小合而大異

豈魏收潤益之耶藝文類聚作魏收非通鑑節文藝文猶略今從文苑英華所載為全魏

書在前此  
故次列

觀夫辰象麗天山岳鎮地方以類聚物以羣分建之以

邦國樹之以君長日月於是莫二宇宙所以總一雖五  
運相推百王革命此道之行孰之能改而皇家承統光  
配彼天義洽幽明化周動植崇文德以來遠修禮讓以  
止訟舞干戚于兩階執玉帛于萬國玄功潛運至德旁  
通百姓日用而不知兆民受賜而無迹唯彼吳越獨阻  
聲教匪民之咎責有由焉而元首懷止戈之心上宰薄  
兵車之會遂解紮南冠喻以好睦舟車遵沂川陸同光  
亭徼息奔走之勞屯戍無逼卒之變雖嘉謨長筭爰自



我始而罷兵息民彼獲其利侯景豎子本無事業乃枉道于人間遂乾沒于世上鳴吠于爾朱之門鎮守于普泰之日曾無為主之識詎有挈瓶之智既而投命義旗歸身幕府殊異雍齒有類丁公時逢寬政得免大戮棄其瑕滓收其力用預在行伍叅跡驅馳及秦隴逋誅每事經略以河南是空虛之地漢陽非兵戰之衝薄存犄角聊示旗鼓豈資實效寄以遊聲軍機催勒益維景任總兵統旅則有司存而愚褊有積驕憤遂甚屢犯軍紀

自生疑貳禍心潛搆翻成亂階負恩棄德罔恤天討不  
義不昵厚而必顛委慈母似脫屣棄寵弟如遺芥龍鍾  
稚子痛苦成行變彼諸姬破亡為伍滅伯春之婉轉慕  
姜兒之爽言不與狼虎同仁而共豺狸等惡及遠託關  
隴依憑姦異逆主定君臣之分賊臣結兄弟之親解其  
倒懸仰人鼻息一日無恩終成難養俄而易慮躬擐干  
戈釁暴惡盈側首無託以金陵逋逃之數江南統御之  
地甘辭卑體進熟圖身讒言浮說抑可知矣叛豎投命

豈將擇音而偽朝大小幸灾忘義主荒於上臣蔽於下  
逐雀去草曾不是圖竊寶叛邑椒蘭比好人而無禮其  
能國乎亦既失信不亡何待今帝道休明皇猷允塞四  
民樂業百靈効祉故丞相材標國楨道潤時雨義冠伊  
霍勲蓋桓文大君立德世功世祿作民舟楫為國棟梁  
內外齊心上下同德蛟騰虎嘯風生雲起麾日則車懸  
轉舍排山則龍門洞開吞雲夢於胸中運天下於掌內  
雖有賊臣去國亡卒出境何異一毛之落牛體雙鳧之

飛海曲彼既連結姦惡斷絕隣好追兵保境縱盜侵國  
蓋物無定方事無常勢或乘利而受害或因得而更失  
是以吳侵齊境遂致勾踐之師趙納韓地終有長平之  
役矧乃鞭撻疲民侵軼徐部築壘擁川捨信邀利此而  
可忍孰不可懷是以援枹秉麾之將投石拔距之士深  
銜僞主信納叛亡含怒作色如赴私讎意存涉血義不  
旋踵攻戰之利實若有神連營聚衆依山傍水舉螳螂  
之斧被蛄蜣之甲當窮轍以待輪坐積薪而候燎及其

鋒刃暫援埃塵旦接便已亡戟棄戈土崩瓦解陽以  
從子之親為戎首之任非獨力屈道窮亦將無路還蜀  
兼亦挾子垂翅俱在籠樊將士以昧禍之心為助亂之  
事皆掬指舟中披甲鼓下同宗異姓縲紲相望曲直既  
殊強弱不等父出子孤自取其敗違卜愼諫何以辭責  
雖復貪利苟得背同即異獲一人而失一國見黃雀而  
忘深穽食鈎吻以療饑飲鴆毒以救渴智者所不為仁  
者所不向誠既往之難逮猶將來之可追景以鄙俚之

夫遭風雲之會位登三事邑啓萬家揣身量分久當止  
足而周章向背離披不已夫豈徒然意亦可見彼乃示  
之以利器誨之以慢藏使其勢得容姦令其時堪乘便  
既南風不競天亡有徵老賊奸謀復將作矣然則摧堅  
强者難為功拉枯朽者易為力計其雖非孫吳猛將燕  
趙精兵猶是久涉行陣曾習軍旅豈同輕剽之師不比  
危脆之衆距此則作氣不足攻彼則為勢有餘恐尾大  
于身踵麤于股倔强不掉狼戾難馴呼之則反速而釁

小不徵則叛遲而禍大會應遙望廷尉不肯為臣自據  
淮南亦欲稱帝但恐楚國亡援禍延林木城門失火殃  
及池魚橫使江淮士子荆揚人物死亡矢石之下天折  
露霧之中彼梁主操行無聞輕險有素工用其短以少  
為多反覆山淵顛倒冠屨射爵論功盪舟稱力年既老  
矣耄又及之政散民流禮崩樂壞改換朝章變易官品  
雖勢異漢朝而事同新室加以用捨乖方立廢失所矯  
情動衆飾智驚愚毒螫滿懷妄敦戒業躁競盈胸謬治

清淨內恣鴟靡外逞殘賊人人厭苦家家思亂災異降  
于上怨讟興于下履霜有漸堅氷且至恃浮躁之風俗  
任輕薄之子孫朋黨路開兵權在外必將禍生骨肉難  
起腹心強弩衝城長戟拍闕徒探雀鷲無救府藏之虛  
空請熊蹯詎延晷刻之命外崩中潰今實其時鵲蚌相  
持我乘其弊方使高旗舒旆長轂啓行迅騎追風精甲  
耀日四七並列百萬為羣風飄雲動星羅海運以此赴  
敵何敵不摧以此攻城何城不陷猶為岸上之虎當作



水中之龍以轉石之形為破竹之勢將使錦帆渡江青  
蓋入洛荆棘生建業之宮麋鹿遊姑蘇之館但恐兵車  
之所輶轢劒騎之所蹂踐杞梓於焉傾折竹箭以此摧  
殘若吳之王孫蜀之公子順時以動見機而作面縛銜  
璧肉袒牽羊歸款軍門委命下吏當使焚櫬而出拂席  
相待必以楚材將為晉用固乃喜得異度實自利獲士  
衡即授客卿之秩特加驃騎之號斯蓋壯士封侯之日  
丈夫立節之秋冬冰可折時不再來先事預懷有如皎

日王侯無種工拙在人凡百君子勉求多福若不改迷  
坐待淪沒一旦暴骨草莽流血成川猶且不悟噬臍何  
及故宣往意馳此簡書檄之到彼咸共申省

宇宙藝文  
作帝王此

道二句作此道所行孰云能易疑貳通鑑作猜貳賊臣  
作偽相躬擐作親尋追兵作徵兵捨信作捨舟連營擁  
衆英華作徵兵聚衆猶子藝文作從子縲紲英華作縲  
纍似登鑑作位班既南風不競作今見南風不競政喪  
作政荒動衆鑑作動俗恃浮躁作險躁難起作縲起請  
英華作伺相持藝文作相挽英華作相危蹂踐作蹈踐  
杞梓藝文作椅梓英華  
藝文句字誤者已經改正

宋景業

廣宗人天保初  
封長城縣子

上言齊文宣

景業魏武定初任北平太守文宣作相景業因高德政上言時武定

八年三月也

易稽覽圖曰鼎五月聖人君天與延年齒東北水中度人王高得之謹案東北水謂渤海也高得之明高氏得

天下也北史

魏收

字伯起鉅鹿下曲陽人仕魏廣平王從事中郎兼中書舍人入齊歷齊州刺史

齊王九錫冊文

魏孝靜帝武定八年封高洋為齊王加九錫殊禮因禪位魏

收傳云齊將受禪楊愔奏收置別館令撰禪代詔冊九錫建臺及勸進文表

於戲敬聽朕命夫唯天為大列晷宿而垂象謂地蓋厚  
疏川岳以阜物所以四時代序萬類駢羅庶品得性羣  
形不夭然則皇王統厯深視高居拱默垂衣寄成師相  
此則夏伯殷尹竭其股肱周成漢昭無為而治項者天  
下多難國命如旒則我建國之業將隆於地齊獻武王  
奮迅風雲大濟艱危爰翼朕躬國為再造經營庶士以  
至勤憂及文襄承構愈廣前業康邦夷難道格穹蒼王  
縱德應期千齡一出惟幾惟深乃神乃聖大崇霸德實

廣相猷雖冥功妙實藐絕言象標聲示迹典禮宜宣今  
申後命其敬虛受王搏風初舉建旗上地庇民立政時  
雨旁流下識廉耻仁加水陸移風易俗自齊變魯此王  
之功也仍攝天臺總叅戎律策出若神威行朔土引弓  
竄跡松塞無烟此又王之功也逮光統前緒持衡匡合  
華戎混一風海調夷日月光華天地清晏聲接響隨無  
思不偃此又王之功也邈矣炎方逋違正朔懷文曜武  
授略申規淮楚連城濯然桑落此又王之功也關峴衿

帶跨躡蕭條腸胃之地岳立鵠峙偏師纔指渙同氷散  
此又王之功也晉熙之所險薄江雷迴隔聲教迷方未  
改命將鞠旅覆其巢穴威略風騰傾懾南海此又王之  
功也群蠻跋扈世絕南疆搖蕩邊垂亟為塵梗懷德畏  
威向風請順傾陬盡落其至如雲此又王之功也胡人  
別種延蔓山谷首渠萬旅廣袤千里憑險不恭恣其桀  
黠有樂淳風相携叩款粟帛之調王府充積此又王之  
功也茫茫涉海世敵諸華風行鳥逝倏來忽往既飲醇

醪附同膠漆醴裘委仞奇獸銜尾此又王之功也秦川  
尚阻作我仇讎爰挹椒蘭飛書請好天動其衷辭卑禮  
厚區宇又寧遐邇畢至此又王之功也江陰告禍民無  
適歸蕭宗子弟尚相投庇如鳥還山猶川赴海荆江十  
部俄而獻割乘此會也將混來方此又王之功也天平  
地成率土咸茂禎符顯見史不停筆既運百木兼呈九  
尾素過秦崔蒼比周烏此又王之功也搜揚筦庫衣冠  
獲序禮云樂云銷沈俱振輕徭徹賦矜獄寬刑大信外

彰深仁遠洽此又王之功也王有安日下之大勲加以  
表光明之盛德宣贊洪猷以左右朕言昔旦奭外分毛  
畢入佐出內之任王宜總之人謀鬼謀兩儀協契錫命  
之行義申公道以王踐律蹈禮軌物蒼生圓首安志率  
心歸道是以錫王大路戎路各一玄牡二駟王深重民  
天唯本是務衣食之用榮辱所由是用錫王衮冕之服  
赤舄副焉王深廣惠和易調風化神祇且格功德可象  
是用錫王軒懸之樂六佾之舞王風聲振赫九域咸綏



遠人率俾奔走委賁是用錫王朱戶以居王求賢選衆  
草萊以盡陳力就列罔非其人是用錫王納陛以登王  
英圖猛槩抑揚千品毅然之節肅是非違是用錫王武  
賁之士三百人王興亡所繫制極幽顯紀行天討罪人  
咸得是用錫王鈇鉞各一王鷹揚豹變實扶下土狼顧  
鴟張罔不彈射是用錫王彤弓一彤矢百盧弓十盧矢  
千王孝悌之至通於神明率民興行感達區宇是用錫  
王秬鬯一卣珪瓚副焉往欽哉其祇順往冊保弼皇家

用終爾休德對揚我皇祖之休命

朕言疑有脫誤

### 魏禪齊詔

三才剖判百王代興治天靜地和神敬鬼庇民造物咸  
自靈符非一人之大寶實有道之神器昔我祖宗應運  
奄一區宇厯聖重光暨于九葉德之不嗣仍離屯圯盜  
名字者遍於九服擅制命者非止三公主殺朝危人神  
靡繫天下之大將非魏有賴齊獻武王奮揚靈武尅剪  
多難重懸日月更綴參辰廟以掃除國由再造鴻敷巨

業無得而稱逮文襄承構世業逾廣邇安遠服海內晏  
如國命已康生生得性迄相國齊王緯文經武統茲大  
業盡叡窮幾研深測化思隨冥運智與神行恩比春天  
威同夏日坦至心于萬物被大道于八方故百僚師師  
朝無秕政網疏澤洽率土歸心外盡江淮風靡屈膝辟  
地懷人百城奔走關隴慕義而請好瀚漠仰德而致誠  
伊所謂命世應期實撫千載禎符雜遝異物同途謳頌  
填委殊方一致代終之迹斯表人靈之契已合天道不

遠我不獨知朕入纂鴻休將承世祀籍爰立之厚延宗  
社之筭靜言大運欣于避賢遠惟唐虞禪代之典近想  
魏晉揖讓之風豈可昧興替之禮稽神祇之望今便遜  
於別宮歸帝位於齊國推聖與能眇符前軌主者宣布  
天下以時施行

冊文

咨爾相國齊王夫氣分形化物繫君長皇王遞興人非  
一姓昔放勳馭世沈璧屬於重華握厯持衡擁璇所以

英賢茂實昭晰千古豈盛衰有運興廢在時知命不得  
不授畏天不可不受是故漢劉告否當塗順民曹厯不  
永金行納禪此皆重規襲矩率由舊章者也我祖宗光  
宅混一萬寓迄于正光之末奸孽乘權厥政多僻九域  
離盪永安運窮人靈殄瘁羣逆滔天割裂四海國土臣  
民行非魏有齊獻武王應期授手鳳舉龍驤舉廢極以  
立天扶傾柱而鎮地剪滅黎毒匡我墜厯有大德於魏  
室被博利於蒼生及文襄繼軌誕光前業內剿凶權外

摧侵叛遐邇肅晏功格上玄王神祇協德舟梁一世體  
文招武追變窮微自舉跡藩旗頌歌總集入統機衡風  
猷弘遠及大承世業扶國昌家相德日躋霸風愈邈威  
靈斯暢則荒遠奔馳聲略所播而隣敵順款以富有之  
資運英特之氣顧盼之間無思不服圖牒潛蘊千祀彰  
明嘉禎幽祕一朝紛委以表代德之期用啓興邦之迹  
蒼蒼在上照臨不遠朕以虛昧猶未逡巡靜言媿之坐  
而待旦且時來運往媯舜不暇以當陽世革命改伯禹

不容于北面况于寡薄而可踟躕是以仰協穹昊俯從  
百姓敬以帝位式授于王天祿永終大命格矣於獻其  
祗承歷數允執其中對揚天命斯年千萬豈不盛歟

屬于

有誤千  
祀有誤

### 上魏書十志啓

天保二年詔收撰魏史除魏尹故優以祿力  
專在史閣不知郡事五年三月奏上之除梁  
州刺史收以志未成請終業十一月與司空  
司馬辛元植國子博士刁柔左主客郎中高  
孝幹前西河太守蔡  
母懷文等復奏十志

臣收等啓昔子長命世偉才孟堅冠時特秀憲章前詰  
裁勒墳史紀傳之間申以書志緒言餘迹可得而聞叔  
峻刪緝後劉紹統削撰季漢十志實範遷固表蓋闕焉  
曹氏一代之籍了無具體典午終世之筆罕云周洽假  
復事播四夷盜聽間有小道俗言要竒好異考之雅舊  
咸乖實錄自永嘉喪圯中原淆然偏偽小書殆無可取  
魏有天下跨蹤前載順末克讓善始令終陛下極聖窮  
神奉天屈已顧盼百皇指掌萬世深存有魏撫運之業



永念神州人倫之緒臣等肅奉明詔刊著魏籍編紀次傳備聞天旨竊謂志之為用網羅遺逸載紀不可附傳非宜理切必在甄明事重尤應標著搜獵上下總括代終置之衆篇之後一統天人之迹褊心末識輒在于此是以晚始撰錄彌歷炎涼採舊增新今乃斷筆時移世易理不刻船登閣含毫論叙殊致河溝往時之切釋老當今之重藝文前志可尋官氏魏代之急去彼取此敢率愚心謹成十志二十卷請續于傳末併前例目合一

百三十一卷臣等妨官秉筆迄無可採塵黷旒冕墮深  
氷谷謹啓 十一月持節都督梁州諸軍事驃騎將軍  
梁州刺史前著作郎富平縣開國子臣魏收啓

平南將軍司空司馬修史臣辛元植

冠軍將軍國子博士修史臣刁柔

陵江將軍尚書左主客郎中修史臣高孝幹

前西河太守修史臣綦母懷文

與李德林書

收與楊休之論齊書起元事  
勅集百司會議收與德林書

前者議文總諸事意小如混漫難可領解今使隨事條列幸為留懷細加推逐凡言或者皆是敵人之議既聞人說因而探論耳

李德林復書

德林字公輔博陵安平人齊中書侍郎歷周入隋終湖州刺史

即位之元春秋常義謹按魯君息姑不稱即位亦有元年非獨即位得稱元年也議云受終之元尚書之古典謹按大傳周公攝政一年救亂二年伐殷三年踐奄四年建侯衛五年營成周六年制禮作樂七年致政成王

論者或以舜禹受終是為天子然則周公以臣禮而死此亦稱元非獨受終為帝也蒙示議文扶病省覽荒情迷識暫得發蒙當世君子必無橫議惟應閣筆贊成而已輒謂前二條有益於議仰見議中不錄謹以寫呈

重遺李德林書

惠示二事感佩殊深以魯公諸侯之事昨小為疑息姑不書即位舜禹亦不言即位息姑雖攝尚得書元舜禹之攝稱元理也周公居攝乃云一年救亂似不稱元自

無大傳不得尋討一之與元其事何別更有所見幸請論之

李德林重答書

攝之與相其義一也故周公攝政孔子曰周公相成王  
魏武相漢曹植曰如虞翼唐或云高祖身未居攝灼然  
非理攝者專賞罰之名古今事殊不可以體為斷陸機  
見舜肆類上帝班瑞羣后便云舜有天下須格於文祖  
也欲使晉之三主異於舜攝竊以為舜若堯死獄訟不

歸便是夏朝之益何得不須格於文祖也若使用王者之禮便曰即真則周公負宸朝諸侯霍光行周公之事皆真帝乎斯不然矣必知高祖與舜攝不殊不得從士衡之謬或以為書元年者當時實錄非追書也大齊之興實由武帝謙匿受命豈直史也比觀論者聞追舉受命之元多有河漢但言追數受命之歲情或安之似所怖者元字耳事類朝三是許其一年不許其元年也案易黃裳元吉鄭玄注云如舜試天子周公攝政是以試

攝不殊大傳雖無元字一之與元無異義矣春秋不言  
一年一月者欲使人君體元以居正此蓋史之婉辭非  
一與元別也漢獻帝死劉備自尊崇陳壽蜀人以魏為  
漢賊寧肯蜀主未立已云魏武受命乎士衡自尊本國  
誠如高議欲使三方鼎峙同為霸名習氏漢晉春秋意  
在是也正司馬炎兼并許其帝號魏之君臣吳人竝以  
為戮賊亦寧肯當塗之世云晉有受命之徵史者編年  
也故魯號紀年墨子又云吾見百國春秋史又有無事

而書年者是重年驗也若欲高祖事事謙冲即須號令  
皆推魏氏便是編魏年紀魏事此即魏末功臣之傳豈  
復皇朝帝紀者也陸機稱紀元立斷或以正始或以嘉  
平束皙議云赤雀白魚之事恐晉朝之議是并論受命  
之元非止代終之斷也公議云陸機不論元者是所未  
喻願更思之陸機以刊木著於虞書龕黎見於商典以  
蔽晉朝正始嘉平之議斯又謬矣惟可二代相涉兩史  
並書必不得以後朝創業之迹斷入前史若然則世宗



高祖皆天保以前惟入魏氏列傳不作齊朝帝紀可乎

此既不可彼復何證

並隋書 隋秘書監王邵撰齊志 李德林更創紀傳廣邵志為二十

七卷開皇初續增為三十七篇至唐貞觀中德林子百藥復演為五十卷今所傳北齊書是也

祭荊州刺史陰道方文

維太昌元年十二月庚申朔越十二日辛未友人鉅鹿  
魏收謹以清酌少牢之饌敬祭於荊州刺史陰君之靈  
嗚呼哀哉惟君世載不殞英聲在茲風流有屬自爾弘  
之孝為行本忠實身基既言斯立罄禮窮詩器則清賞

才惟英博於暢風雷蕭條丘壑顧言朝市忘懷淡薄比  
契沈冥均情寂寞往塵守官及爾同僚塤箎合韻琴瑟  
俱調丹墀踵武清道齊鑣跡淪閒曠心共津濠乃眷平  
生相忻同趨殷勤宴喜流連辭賦湔矣不追長違世務  
詠彼徒在音徽空樹昔猶肢體與子裘裳今其往也生  
死殊方形骸何促天地何長申茲沃醑贈以哀傷嗚呼  
哀哉

為侯景叛移梁朝文

夫化成萬物分界九道紀之以山河照之以日月方足  
圓首含氣呈形咸總之于聖人畢會之以朝市皇魏應  
銜甲之祕圖納封金之寶命萬方為宅四海為家卜世  
靈長將踰八百年壤之間朝不別焉唯夫三江五湖九  
蠻百濮其地如掌人鳥未分瞻星昧環拱之方托水迷  
朝宗之義積蠅為衆長蛇稱長石田無菽粟之用衆人  
非聲教所孚是以年歷三偽棄而不有豈力不足蓋所  
未徵而陸梁塗泥時軼疆鄙天討所遺理存惡殺自二

紀及茲中原多故未清區宇文武兼勤偃伯歸戰有懷  
勞止將令動植俱仰堯心遂冠蓋括途象胥提告推誠  
蹶然類識王道授衣禮節拜首歸仁舞戚所以為高止戈  
故能稱大方知夙沙交臂不待兵車有苗納款未勞征  
伐而庸夫為善希能令終狂人克念更知徒語聞利無  
匹夫之信好虐有助鬼之心白頭為賊曾莫自揆嘉文  
浮功甘于苟得罔顧榆次之禍詎識江浦之禽侯景一  
豎微蔑民斯下矣人倫士操本自不倫直以少從羈勒

頗習趨走叨忝名器事出爾朱藏情諂笑唯利是視義  
兵同舉羣胡覆族雖狐祭首丘事非小人而忘恩背本  
景為先至不義不信自此可知但丁公之戮時有未可  
也大澤深山龍蛇並育遂容其悔非棄其瑕穢任以將  
率授以兵符庶其被鞍銜鍊盡力驅馳指蹤投繯駕兔  
或擒而弱才負重折足是慮置之不爭之地虛出韓鄭  
之間曾無戰伐之勤可言摧陷之績歲往年徂率無可  
紀而腹心羣小信納逋亡劫奪行道侵掠民庶流聲遠

聞王法有典驄馬將出朱筆且行自貽伊戚了不知咎  
盜憎主人乃圖逆節拔本塞源以委身賊虜逼脅居民  
翻蕩城池叉手曲躬千里唯諾殘賊相依忻同鱗水寵  
以大位屬以東方外曰臣主內深骨肉安危契闊約以  
死生拯其鼎鑊之命全其蠶粉之禍時不暇浹翻然易  
慮還相掩擊事劇仇讐反覆剽獲莫非此類至於老母  
暮倚少弟升岡妻望行夫子號出父食毛之屬可為痛  
心哉景忽之如草芥棄之如塵垢任其斲戮之誅安其

烹斬之痛放麀食子有以可親觀臧窮否恥其並主獸  
心人面華裔同讎歸家懼執法之刑赴賊反噬臍之釁  
首領無地進退數窮遂騁邪說自託左右苟有君子義  
均逐雀而彼方上下樂禍好亂叛竊之豎獲毒之人圖  
浮芥之小利忘丘山之大禍乃崇飾土偶被以玄黃馳  
馬高蓋載鸞為重委以專征施其爪角驅逼子姓率我  
叛亡逼厭虐之侶鞠苦後之衆蟻攢蚋集侵竊邊鄙恤  
患分災本不要于遠僻違衆悖禮盖神明之所誅皇帝

垂旒華土則天而動卷覆三古懷佩百王掌握中道崇  
基增構殊塗同會百慮一歸中外禔福戎華俱庇持秋  
霜夏震之威以拔山超海之力顧指則風雲總至迴眸  
而山岳削平雖復旗鼓所臨有征無戰猶以師出而服  
辱在我世所務者息民所存者文德豈復以擒將威敵  
漂杵溺驂為功于一時示武于千載且天生五材有聞  
前古禍非我貽其得已乎遂置壇命將持柯畢禮引營  
就道分途競馳批熊舉輪之士翹闕扛鼎之卒被組橫



矛執戈挺劍龍駒並躍驥子千羣沸聒天壤蒸鬱雲霄  
一朝指揮倏忽千里候騎羅絡聊逞前驅天兵之鼓未  
鳴衆軍之旗詎接而荆揚烏合一朝崩解塞州滿野馘  
耳截鼻以千萬計不可勝數宗親節將咸見擒束委命  
軍吏憂在釁鼓楚兵吳甲積若山丘青雀赤烏噎流斷  
岸千金之貴為我資焉痛辱可哀其利安在覆師喪旅  
禍本可尋方之噬臍悔之靡及皆侯景叛戾虛相陷誘  
指成提挈之舉終無犄角之勢景棄本趨末背國違鄉

部下數千屈逼羅網離親懷土一日三秋拘網立鉞朝  
不謀夕豈能搖足東上遠赴彭城天奪彼梟信納虛詭  
使蕭明貴孫面縛于徐泗景為凶數逡巡而坐觀託人  
七尺之身居人成敗之地急病讓醫固若此也兩端自  
見故態未除今知東南滌蕩睢潼清復梁之喪師單輪  
不返擊援之期終當無日勢窮路盡憂在滅亡事留變  
生將謀及已且彼軍殲殄江淮屠酷禍源釁迹景實為  
之上懼金陵君長致請設之責下恐荆吳子弟洗父兄

之冤愚小猜驚將興異計乘專任之機藉方面之重必當招結僇楚扇合無賴內自封植外絕防禦因見信而類起出不疑以竊發事比疾雷理同激矢上或惡陵乘疾專擅縱橫下則鴟峙淮肥覬覦叛渙老疾姦回不虛然也而彼土區區厚加崇納置之襟帶之方處以藩籬之所費金帛于烈火罄酒漿于漏卮非乘景虛聲委其實用夫量材授任必原其始考行責成當存其大景豺聲蜂目之首狼心狐魅之徒義無父子棄同即異捐親

背德于我尚反目而去在梁則何施可懷且我重傷心  
尾大不掉魚脫于淵義彰老氏而假威凶險授柄姦回  
欲求肝膽之誠更啓危亡之兆固智者不為迷者遂去  
若抽薪止沸剪草除根壺首囊頭叉手械足返國姦于  
司敗歸侵地于玄武非直惡之在今天道人事實棄無  
禮苟違之者其長世何若悔非知罪恭承德音且欲飛  
驛合符班師凱入悠悠水鄉有救其死若乃執飾非之  
辨固遂過之失便當盡常勝之戰極必取之攻飛江南

渡深山將恐削壤卑名雖頓顙而不獲亡宗滅廟望喬  
木而可悲昔田假英人於期壯士窮而歸我許以入懷  
景悚悖狗子攪亂四國庸可紓難棄若孤雛何足戀戀  
于亂臣勤勤于賊子也王者之威心厲如霜雪信同寒  
暑言猶麗天移至深念變通熟量可否幸思大雅無貽  
後悔

為文宣帝西伐書

三國典略云齊主在東山遊  
讌以闕隴未平投杯赫怒召

魏收於前立為書齊主于兗首下足九言曰  
雖藏山沒水終不縱赦北齊書云收立為詔

書宣示遠近是歲周文  
帝殂則天保七年也

朕歷數在躬志清四海蕞爾秦隴久阻風化混一之事  
期在今日必當訓旅誓衆天動雲臨朕已下甲汾流沉  
船晉地便當躬先將士平陵玉壁徑掩長安梟彼兇首  
朕與梁國舊敦好睦聞其奸計乃欲規謀宜令上黨王  
渙總勒熊羆星流風捲王者之言明如日月宜宣內外  
咸使聞知

太子冬會議

天保元年皇太子監國在西林園  
冬會又議東面二年於北城第內

冬會又議東面吏部郎陸卬疑非禮魏收改  
為西面邢子才議竟執東面收執西面援引  
經據交相往復其後  
竟從收西面為定

邢子才議

凡禮有同者不可令異詩說天子至於大夫皆乘四馬  
況以方面之少何可皆不同乎若太子定西面者王公  
卿大夫士復何面也南面人君正位今一官之長無不  
南面太子聽政亦南面坐議者引晉舊事太子在東宮  
西面為避尊位非為嚮臺殿也子才以為東晉博議依

漢魏之舊太子普臣四海不以為嫌又何疑於東面禮  
嗣子絕旁親嗣子冠於阼冢子生接以太牢漢元著令  
太子絕馳道此皆禮同于君又晉王公嗣攝命臨國乘  
七旒安車駕用三馬禮同三公近宋太子乘象輅皆有  
同處不以為嫌况東面者君臣通禮獨何為避明為嚮  
臺所以然也近皇太子在西林園於殿猶且東面於北  
城非宮殿之處更不得耶諸人以東面為尊宴會須避  
按燕禮燕義君位在東賓位在西君位在西階故有武



王踐阼篇不在西也禮乘君之車不敢曠左君在惡室其位左亦在東不在西也君在阼夫人在房鄭注人君尊東也前代及今皇帝宴會接客亦東堂西面若以東面為貴皇太子以儲后之禮監國之重別第宴臣賓自得申其正位禮者皆東宮臣屬公卿接宴觀禮而已若以西面為卑實是君之正位太公不肯北面說丹書西面則道之西面乃尊也君位南面有東有西何可皆避且事雖少異有可相比者周公臣也太子子也周公為冢

宰太子為儲貳明堂尊於別第朝諸侯重於宴臣賓南  
面貴于東面臣疎於子冢宰輕于儲貳周公攝政得在  
明堂南面朝諸侯今太子監國不得於別第異宮東面宴  
客情所未安且君行以太子監國君宴不以公卿為賓  
明父子無嫌君臣有嫌按儀注親王受詔冠婚皇子皇  
女皆東面今不約三公南面獨約太子何所取耶議者  
南尊改就西面轉居尊位更非合禮方面既少難為節  
文東西二面君臣通用太子宜然於理為允

魏收議

卷二

去天保初皇太子監國冬會羣官于西林園都亭坐從  
東面義取於嚮中宮殿臺故也二年于宮冬會坐乃東  
面收竊以為疑前者遂有別議議者同之邢尚書以前  
定東面之議復申本懷此乃國之大禮無容不盡所見  
收以為太子東宮位在于震長子之義也按易八卦正  
位嚮中皇太子今居北城于宮殿為東北南面而坐於  
義為背也前者立議據東宮為本又按東宮舊事太子

宴會多以西面為禮此又成證非徒言也不言太子常無東西二面之坐但用之有所至如西園東面所不疑也未知君臣車服有同異之議何為而發就如所云但知禮有同者不可令異不知禮有異者不可令同苟別君臣同異之禮恐重紙累札書不盡也

杜氏通典

枕中篇

收以子姪少年申以戒厲著枕中篇

吾曾覽管子之書其言曰任之重者莫如身途之畏者莫如口期之遠者莫如年以重任行畏途至遠期惟君

子為能及矣追而味之喟然長息若夫岳立為重有潛戴而不傾山藏稱固亦趨負而弗停呂梁獨浚能行歌而匪惕焦原作險或躋踵而不驚九陔方集故眇然而迅舉五紀當定想宵乎而上征苟任重也有度則任之而愈固乘危也有術蓋乘之而靡恤彼其遠而能通果應之而可必豈神理之獨爾亦人事其如一嗚呼處天壤之間勞死生之地攻之以嗜欲牽之以名利梁肉不期而共臻珠玉無足而俱致於是乎驕奢仍作危亡旋

至然則上智大賢唯幾唯哲或出或處不常其節其舒也濟世成務其卷也聲銷迹滅王帛子女椒蘭律呂諛諛無所先稱肉度骨膏唇挑舌怨惡莫之前勲名共山河同久志業與金石比堅斯蓋厚棟不撓遊刃砉然逮于厥德不常喪其金璞馳驚人世鼓動流俗挾湯日而謂寒包嶢壑而未足源不清而流濁表不端而影曲嗟乎膠漆謂堅寒暑甚促反利而危害化榮而就辱欣戚更來得喪仍續至有身禦魑魅魂沈狴獄詎非足力不

彊迷在當局孰可謂車戒前傾人師先覺聞諸君子雅  
道之士遊遨經術厭飫文史筆有奇鋒談有勝理孝悌  
之至神明通矣審道而行量力而止自我及物先人後  
己情無繫於榮悴心靡滯於愠喜不養望於丘壑不待  
價於城市言行相顧慎終猶始有一於斯鬱為羽儀恪  
居展事知無不為或左或右則髦士攸宜无悔无吝故  
高而不危異乎勇進忘退苟得患失射千金之產邀萬  
鍾之秩投烈風之門趨炎火之室載蹶而墜其貽宴或

蹲乃喪其貞吉可不畏歟可不戒歟門有倚禍事不可  
不密牆有伏寇言不可或失宜諦其言宜端其行言之  
不善行之不正鬼執彊梁人囚徑庭幽奪其鬼明天其  
命不服非法不行非道公鼎為已信私玉非身寶過緇  
為紺踰藍作青持繩視直置水觀平時然後取未若無  
欲知止知足庶免于辱是以為必察其幾舉必慎於微  
知幾慮微斯亡則稀既察且慎福祿攸歸昔蘧瑗識四  
十九非顏子幾三月不違跬步無已至於千里覆一簣



進及于萬仞故云行遠自邇登高自卑可大可久與世  
推移月滿如規後夜則虧槿榮于枝望暮而萎夫奚益  
而非損孰有損而不害益不欲多利不欲大唯居德者  
畏其甚體真者懼其大道尊則羣謗集任重而衆怨會  
其達也則尼父栖遑其忠也而周公狼狽無曰人之我  
狹在我不可而覆無曰人之我厚在我不可而咎如山  
之大無不有也如谷之虛無不受也能剛能柔重可負  
也能信能順險可走也能智能愚期可久也周廟之人

三緘其口漏卮在前歌器留後俾諸來裔傳之座右為重

北史作而重躋踵作削踵顏子子  
下有隣字覆一簣進作覆簣而進

北齊文紀卷二